

# OLA


PULETINI A'OGA

e faasoa faamatalaga mo a'oga i le gagana Samoa

www.ola888.com



O lou tala—Misi Parate & Tusitala



Niu Sila—Valaau TEU mo se fuataga

26 NOVEMA 2018 ~ Lomiga 35 ~ Upega Tafailagi: www.ola888.com ~ Telefoni (03) 382 6674 ~ Tuatusi: ola.niupac@gmail.com; ~ evaleon.books@gmail.com ~ E le faatauina ~ A Free Publication

## otootoga

### Se su'esu'ega i Otako

O loo faia se su'esu'ega a le pulega o le iunivesite a Otako, e fia iloa le faamaoni o se tuua'iga, e iai se tasi na kopi (cheat) i se su'ega sa faia o lenei tausaga. Ua faamaonia, o se tasi sa su'eina se pepa o le tikeri foma'i (medical), ma o le popolega tele i e na su'e, o le toe faia o se isi su'ega e sui a'i. O loo taofia nei soo se gaioiga tau i le su'ega, se'ia mae'a le sailigia. O se taimi lata mai e faailoa ai sona iuga.

### Se su'esu'ega i Aukilani

O se tasi su'esu'ega e aafia ai le lala a le iunivesite o Massey i Aukilani. Na lipotia i le pulega ni faasalalauga i luga o le laina e ofoina atu ai ni tautua i fanau a'oga mo se totogi. O le ofo e tusia ni pepa mo e a'o'oga na faalauiloa i luga o le WeChat, o se tautua e faapitoa i tagata Saina. O le tusitusi mo se isi i se tau tupe o se faafitauli o loo aliali a'e pea i Aukilani.

### Faaleiloga se tali i le ofo

Ua iloa i numera le tulaga faaleiloga o le tali mai a fanau a'oga i le ofo a le malo e a'o'oga fua. E tusa i molimau e lei ausia tapulaa sa naunau le malo i ai i le ulua'i tausaga. Ua iloa foi le apoina e fanau a papalagi nai lo isi faiganuu. E 71 pasene o e na apoina o tama ma teine Europa. E sili foi latou i le numera o e auai i toleniga mo tomai i totonu o falefaigaluega; e 79 pasene. E vaivai le tali atu a fanau Pasefika ma isi i le ofo.

### Lapo'a o le vasega

O le tasi mataupu o loo mana'omia ai se tali a le minisita o le lapo'a o le vasega. Saunoa le peresitene o le NZEI, o le tasi lea vaega taua i le finau a faia'oga. E fesoota'i le lapo'a o le vasega i le paleni o le faatinoga o le faiva, e mafai ai ona faasoa tutusa le taimi o le faia'oga i fanau uma. O le faitioga, ua alu uma taimi e faatonu ai se vasega to'atele ae leai se a'oga e faia. O le fua a Niu Sila i le tapulaa maulalo o le 26.

### "mafaufauga o le vaiaso"

E sili le manuia o le foa'i i le na te talia.  
Iesu Faola



FALEA'OGA SAMOA: O le falelalaga o le tasi falea'oga taua a Samoa anamua e faafailele ai teine talavou i tomai i le gaosiga o ana measina. O le nafataulima a tina e tu ai soo se ituaiga faalavelave faaSamoa. O loo faaolaola pea e nisi afioaga, e iai Fagasa i Vaisala, Salafai (ata), aveva ma taulaga e saili tomai i ai fanau a le atunuu. I le ata le aumalaga a le Samoa Primary o loo a'o'oga fiafia ai.

## Te'ena e le PPTA le ofo a malo e 9.3 pasene

Ua autasi sui o le iuni a a'oga mauululuga, le PPTA, e te'ena le ofo a le malo e 9.3 pasene.

O le Aso Faraile i luma o le maota o le palemene na faasilasila ai e lana peresitene i le atunuu e ala i le 'aufaasalalau.

Faatasi ma le faasilasilaga se lapata'iga, e tataua ona iai se faaleleiga i le ofo a le malo a o lei mae'a le kuata muamua o le 2019.

Afai e siliga se tali e malilie ai, ona savali tetele lea sui o le iuni mo se aso e tasi.

E 15 pasene o loo talosagaina e le iuni, lea e talitonu ona ta'ita'i ua talafeagai tataua ma le tulaga o totogi o ana sui i lenei taimi.

E 9.3 pasene le ofo a le malo, e 3 pasene i tausaga e tolu, ua te'ena nei.

I lana filifiliga e uia lenei ala na Tuuaina e le peresitene, Jack Boyle, le malo o le faapogai. Saunoa Boyle e le o se mana'o lea o le iuni peita'i ua una'ia i



Limalima faatasi sui o le PPTA e tete'e atu i le ofo a le malo e 9.3 pasene

ai talu le le talimana'o o le malo.

"Matou te le faatali," o se lafoga lea a le ta'ita'i.

I le ofo a le malo e siitia ai totogi o faia'oga fou mai le \$51,200 i le \$55,137, ae amata totogi o i latou ua aulia le tapulaa i le \$78,000 aga'i i le \$85,233.

Na tali le Minisita o A'oga i lona toe valaauina o le iuni e susu mai i le laulau talanoa.

Ua ma'ea ona faailoa se talanoaga i le va o iuni tetele e lua, le NZEI ma le PPTA, e taupule ai i se tali faafaatasi pe a tula'i mai sea mana'oga. O loo feagai foi le malo ma mataupu tautotogi a le tasi iuni, le TEU, e mana'omia ni faaiuga faamalo i ai.

*Ripoti o le Vaiaso:*

## Valaau faia'oga a le TEU mo se fuataga talafeagai o totogi o taiulu

Ua faaleo se lagona o sui o le iuni a faia'oga iunivesite e faatatau i totogi o i latou o taiuluina a'oga teseri a le atunuu. O se faameo e faatatau tonu i le tulaga o le Vice-Chancellor, poo i latou nei e faatonuina faiga faavae a se iunivesite. Pe ta'u foi o pulea'oga o politeki ma iunivesite.

Ua matauina le tulaga ese o totogi o nisi o i latou e manatu le iuni e le o se mea tatau. Pe faapea foi e le tala-feagai ma mau tauave tauleamio e iloa ai se iunivesite, le le fesoota'i ma le tulaga tauletamaoaga o fanau a'oga e ona pili o loo totogi ai i latou.

O le TEU (Tertiary Education Union), o le sui lava lea o faia'oga e faaleoina so latou taofi, ma ua faatu atu nei sa latou talosaga o le tatau ona faataoto se fua faavae e lima-ta'ita'i ai lea tulaga.

O le 'au'au o le talosaga, ia le sili a'e i le faalima taimi le totogi o le taiulu (poo le tapa'au ta'u ai i Samoa), i lena o le faia'oga e aupito maualuga lona totogi.

I le lipoti a le alii o Simon Collins (NZ Herald) na ia faatu mai ai se faatusatusaga i le totogi o le taiulu a Aukilani. O Dr Stuart McCutcheon e \$710,000-\$719,999 lona totogi. Afai e apalai i ai le fua a le TEU, lona uiga e



Stuart McCutcheon, pule a Aukilani; to'atele faia'oga ua malolo i lalo o lana vaaiga

tatau ona totogi i le \$334,000.

E fua lea i le totogi amata o se faia'oga e \$66,839 i le tausaga. Pe faapea foi e \$166,150, e fua i le totogi o le teine ofisa e \$33,302 i le tausaga.

Ua faatu atu foi se talosaga a le iuni i le malo o le faavaeina o se faiga fou e totogi ai ana faia'oga, e sui ai le faiga o loo alu ai nei. Ua ta'utino le iuni i le le malu o ana faia'oga i le faiga o iai nei, ma ua tatau ona sui auā le soifua maloloina o le aufaigaluega.

O loo feagai nisi o a'oga teseri ma mataupu tau i totogi ma vaeaga e mafua i le fesoua'ina o numera o e ulufale ma ulufafo. E tuua'iina e le iuni le faiga lena i faafitauli taugaluega ua afaina ai politeki ma nisi iunivesite a le

atunuu. E fesuia'i pea le numera o a'oga ae le tatau ona so'ona afaina ai le 'aufaigaluega, finau mai le iuni.

O le faameo i le totogi o le pule (VC) e talitonu le iuni e fesoota'i tonu i mau tauave e taulagia i soo se taupulega temokarasi, e faataua se fua tutusa.

E iai foi nisi e talitonu o se tali lea a le iuni i pulega faapei o lena a McCutcheon, o i latou e faasili polofiti i lo tagata faigaluega, ae naunau foi e nonofo pea i totogi tetelē.

Ua leva ona tula'i mai le eseesega lena i le va o le iuni ma pulega. Ia Oketopa 2000 na si'i ai totogi o pule (VC) i le 16 mai le 8 pasene sa iai. Talu mai lea taimi o loo si'i'i'i pea i luga o latou totogi. Ae o loo feagai pea faia'oga ma i'u faigata o a latou faaiuga e faia.

I le 2017 na fa'aaoga ai e le minisita a Peretania le tulaga lelei o Niu Sila e lagolago ai lana faatu mo se siitaga o VC a lea atunuu. E to'atele na tete'e i sea faatusatusaga, ona o le eseesa o atagalua e faavae ai faiga faavae a malo e lua. Atoa foi le finau e le faatusaina Niu Sila i tulaga o iunivesite Peretania i fua faavaomalo e iai le OECD ma isi. I le 2017, e 5 iunivesite Peretania e lavea i le 25 pito i luga, e fua i le tulaga o Niu Sila, e tu 165, lea na maua e Aukilani.

Atonu o se taimi tali mai le malo.

## Faata'oto se fuafuaga 10 tausaga mo le atina'e a'oga amata

Ua i lumāmea se fuafuaga a le malo e faataoto ai le alafua mo a'oga amata (faamasani) i le isi 10 tausaga.

O le igoa o le fuafuaga, He taonga te tamaiti, sa tatala aloa'ia e le minisita o A'oga, Chris Hipkins (ata), i le amataga o le vaiaso ua mavae.

Na fulisia le kapeneta e lagolago le fuafuaga ma ua malilie foi i lona faatupega; tusa lea ma se \$3.5 piona e faasafua ai i totonu o se 10 tausaga lumana'i.

O 'au'au o le fuafuaga e iai sini galua nei. Muamua, ia mafai ona ausia le 100 pasene o faia'oga agavaa i le atunuu atoa, e aofia ai le faaleleia o le resio (ratio) o le faia'oga i le tamaitiiti a'oga. E le o tulaga lelei Niu Sila i le fua a le OECD. Ma na faaalua e Hipkins e fia siitia lena i le 1:4 mo fanau i lalo ifo o le 2 tausaga, 1.5 mo le 2 tausaga, ae 1.10 mo le 3 tausaga ma ona tupu.

I le taimi nei e ta'i 5 tamaiti i le faia'oga e tasi mo fanau i lalo o le 2 tausaga, ae ta'i 10 i le faia'oga e tasi mo le 2 tausaga.



Saunoa le minisita o se inivesi taua lena mo a'oga, ma o le naunauga i le malo ia avea Niu Sila ma atunuu aupito sili ona lelei mo se tamaitiiti e tupu a'e ai. Na ia faamamafa le taua o le ofoina atu o se tautua e lelei ma maualuga le aano.

I le tulaga i faia'oga agavaa, o le sini fia tulitulia o le 100 pasene, ma e fia ausia lea i le 2022 ma fa'aaau ai. I le taimi nei e 50 pasene o loo gaoioi ai Niu Sila i lea atina'e.

O le a tilotilo foi le malo i le faaleleia o totogi o faia'oga ma le aufaigaluega lagolago, saunoa le minisita.

Na tali mai le sui o le National, Nicola Willis, e faailoa le lagolagoina o le fuafuaga e lana itu. Atoa ma se faamanatu, e le tatau ona aafia matua ma aiga i lena fuafuaga a le malo.

E iai matua o loo popole, saunoa Willis, ma e tatau i le malo ona faamanino le tulaga lea i matua.

I lona aotelega e fa ni vaega taua o le fuafuaga ua faailoa:

- E fia ausia le 100 pasene o faia'oga agavaa e galulue
- E fia faaleleia le resio o le faia'oga i le tama poo fanau na te vaaia
- Faaleleia totogi o faia'oga
- Faaleleia tautua e lagolagoina le fuafuaga

Ua avanoa nei le fuafuaga mo ni fautuaga ma ni talosaga e faatau atu i ai, auā lona faaleleiga. O le aso 15 o Mati 2019 e faagata ai.

E le taumate o se avanoa lea e faaleo ai ni taofi o faiganuu Pasefika e tusa ma o latou mana'oga, i lena lava atina'e.

*Faasoa o le Vaiaso: Levi Tavita*

## Totogi o le aufaigaluega o se faailoga o se temokarasi maloloina

E le tauilo le 'auga o talanoaga a Niu Sila i le itupa o a'oga i lenei itula, o totogi o faia'oga. O lea foi ua manatu e tata'i i ai la tatou faasoa o lenei vaiaso.

E le o se lauga i le moni ma le sese ae tau o se faatupumanatu i le faasoa lautele, a aoga tatou ave lea i uta mo le tapua'iga.

E autasi iuni tetele a faia'oga (PPTA, NZEI, ma le TEU) e le o lelei le tologiga o faia'oga, ma o le faapogai lea o tete'e o loo faia nei.

E iai faavae malolosi o loo tu ai luga lenei finau a iuni. Muamua, ua leva aso e lei toe faia se si'itaga o totogi, ae o loo si'isi'i pea i luga le tau o le soifuaga. I le 2002 sa tula'i mai ai i le 81 pasene le maualuga o totogi o faia'oga i le totogi masani (MAI). Ae aulia mai le 2017 ua si'i i luga le totogi masani i le 60 pasene ae na o le 38 pasene le si'i mo faia'oga.

O le finau a le PPTA, e tataua ona si'i totogi i le 15 pasene ina ia vasaga tutusa ai ma le 81 pasene o le si'itaga na gata mai ai, 2001/02.

O le tasi o faafitauli i feutaga'iga o loo fai, o le fesili poo le a tonu le fua e fuatia ai le faamaoni o le finau—e le o lelei ona totogi faia'oga.

Pe tataua ona fa'aoga le fua masani (median) poo le tau o le leipa (LCI). Ae pei ona atagia i taofi o nisi pule ma faia'oga, e le o le fesili pe leaga totogi a o le fesili pe fetau le totogi ma le galuega o loo fai.

A faatusatusa i ausiga a isi malo e tu maualuga Niu Sila. E viia i le lalolagi i le lelei o ana polokalame ma tomai o ana faia'oga. E mafua ai ona gasolo mai le faitau afe fanau a'oga mai fafo. O le tasi lea alamanuia iloga i le tamaoaiga.

E mafua ai le fesili, E faapefea ona lelei? Auā e le te'i ua lelei se mea e iai le mafuaaga.

A fua i le taimi e fa'aaluina i le tiute, fai mai le PPTA e 54.5 itula e faaalu e le faia'oga i lona tiute i le vaiaso. E aofia ai itula galue i le fale ma taaloga ma tulaga uma na. Tusa lea ma se 850 i le 900 itula e faaalu e se faia'oga kiui i lona tiute i le tausaga. Faatusatusa lena i le 700 e masani ai malo o le OECD.

E le faitauina ai le galuega faaleoleo mamoe ma tomai totino e faasoa atu i a latou tamaiti a'oga. Auā e le na o le a'oa'oa atu o le faitau ma le numera, ae iloga foi le sao o faia'oga i le sufi ma le upu faamalosi. O ni mea na e foa'i fua atu e aunoa se totogi.

E ta'u mai i lena se tautua mata'ina o loo ofoina e faia'oga i fanau; e aofia ai ma i latou mai fafo.

Ae avane i le tau e le talafeagai. Ua mafua ai ona tuua le faiva e nisi; e iai se pulea'oga ua ave nei ma se aveloli ona e maua le avanoa e malolo ai pe a manava i le afiafi. O se faailoga foi o le tetee a lea alii i le tulaga lē amana'ia o le faiva. Ua tau saili mai fafo ni e galulue talu ai lona 'alofia e le autalavou.

Ta'utino nisi o le aufaigaluega, e le o le totogi, a o le mafai e le totogi ona talia mana'oga o faia'oga. Muamua i le tausiga o latou aiga. Afai e mana'o le malo i se tautua ta'uleleia faavao-malo, e tataua la ona manatu i se tauilelei e faafiaina ai pea le augalulue. E mafua ona ta'ulelei i latou e pei o Stuart McCutcheon ona o le ositaulaga a ana faia'oga i o latou tomai ma taimi. Afai e talia e le malo le nonofo umi o faia'oga i o latou potu a'oga ae tuu tiute faaleaiga, e tataua foi la ona sauni atu se tali e faamalilie ai i latou.

Ae sili le taua o le amana'ia; auā ua tatou iloa e leai se faalogona aupito malosi i le tagata e tusa ma le amana'ia. I Finelani e tusa i molimau, e filo le faiva faia'oga i le 5 pito i luga a lea malo. E le so'ona maualuluga totogi e fua i isi malo, ae lava lona tulaga faatosina e una'ia ai talavou e auai i le faiva.

Afai la e le amana'ia toe le totogia lelei, ona tula'i mai lea o le ata o loo molimauina nei.

I nisi upu e le tuli le amana'ia i le maualuga o le totogi ae i le faatauina o mana'oga o le 'aufaigaluega. O nisi o na mana'oga e le o tupe a o mea tauleola maloloina ma le amio. O nisi o talanoaga e manatu faia'oga e ao ona ta'imua ai le malo, e iai amio a fanau ua ave ma faalavelave i le tiute.

E mana'omia ni suiga i faavae. E taofi le ausu'esu'e o se galuega lea e ao ona fai e taliina ai le vao faafitauli tuga o loo feagai ma faia'oga.

E tuua'iina e le minisita o A'oga, Chris Hipkins, le malo o le National, ma ana alafua faataoto, e iai le faaofiina mai o atagalua faamaketi ma polofiti, e suia faiga, ma tula'i mai ai faafitauli nei ua feagai ma le malo soofaatasi.

E iai ona tula'i mai le faiga leni e tauia ai pule e fua i le numera o fanau ma tupe latou te aumaia. E tauia ai se a'oga e lelei lona faafoega tautupe, ma avanoa ai sea a'oga i ni tauilelei mai

le malo e ala i faailoga tupe ma poloketi e ofoina. E iai ona tula'i mai le oso a'e faaniutu o totogi o nisi pule, ma le faiga faapisinisi o le faamanifi o tupe fa'aalu ae faasaosao se polofiti. O le tala lea i le National i lalo o John Key ma Bill English. Upu moni e leai se faia'oga e toe fia fo'i i ai.

Ua tatou iloa o soo se tauiviga e iai le 'au e malo iai le itu faia'ina, o le uiga lea e iloa gofie ai le atagalua faamaketi. Lea ua tatou molimauina toto'a i'u o na faiga faavae a le National, i a'oga ua tapuni ma le aufaigaluega ua vaea. E le o se faiga leni e malu ai se aufaigaluega, aemaise i se faiva e pei o le A'oga.

Tautua a'oga e le tataua ona fuaina lona aoga i tupe, ae ao ona tausolomua le malo e faavae se si'omaga maloloina e tupu olaola ai le tomai ma le taleni o i fanau ma faia'oga foi. E aofia ai ni tauilelei mo le aufaigaluega


Ua tuua'iina le Leipa i le taumau i taofi (ideology) ae malosi pea lona lagolagoina ona o le mātāu i mau temokarasi e iai le fuataga tutusa. E to'atele e lagolagoina le TEU i lana talosaga ua tataua ona fuapau totogi o pule o a'oga—faapitoa iunivesite ma politeki. E leai se amiotonu i le totogi o se pule toeitiiti faasefulu le totogi o le faia'oga amata i sana a'oga. Ae a faamanifi tau o tupe faaalu e le lotea lona totogi ae muamua fai lana pule i totogi laiti o isi. Manatua e le o sona atamai na o ia e lelei ai se a'oga.

E foliga ua omia le Leipa i le va; e le gata i le taimi a o le lasi o mana'oga ua saputu faatasi atu i lona faitoto'a.

E tele foi mana'oga o faiganuu Pasefika o loo taomia i le va lea, ae iai le faamoemoe pe a tuuavanoa i le malo mo se taimi. E mana'omia foi e le malo ni fautuaga 'anoa. Atonu e le maua le tali i le ala faigofie, e iai le la'u mai o ni faigaluega mai fafo, ae maua lava i totonu o lo tatou lotoifale. Fai mai nisi e maua i le toefuata'i o faiga o iai nei.

Toe tepa i tua. I le faamau o totogi o le 1979 e tula'i mai ai totogi o faipule ma faia'oga i le laina e tasi—\$18,000. Ae 39 tausaga mulimuli ane e iai leni: faipule \$163,961, faia'oga \$78,000 (totogi e gata ai). E manino le fe'au i numera, sa faataua tutusa faiva tautua i na aso.

O le lu'i mo le malo pe mafai ona toe faafo'isia lea tulaga mo le faiva faia'oga. Ua iloa le Leipa i lona taumau i faiga faavae e atagia ai le fuataga tutusa. Atonu po ua siliga, ae mo nisi, tau lava ina faatumu teisi le ava i sina luutaga talafeagai. Fai mai le PPTA e tumu i le 15 pasene.



## 25 - 30 NOVEMA

25

1894 Aso Sa. Maliu Misi Parate (Pratt) i Sini Ausetalia

1951 Maliu Alfred J Tattersall Pu'eata, i Apia

1994 Tatala maketi Fugalei

2000 Uluai Malaga a le vaa Polenisia 'Upolu' - Apia-Aukilani-Sini -Apia

26

1931 Tatala le falemeli fou i Matafele, Apia

1974 Maua se nofoaga i Mulifanua sa 'aina e tagata Lapita

27

1957 Usu le fono lona fa a le Fono Faitulafono: 41 sui Samoa, 5 sui papalagi. Avea Luafatasaga Kalapu ma fofoga fetalai, sui Amoa

1972 Taunuu i Faleolo le vaa Polenisia, 'Pili' e amata lana tautua

1999 Palota i Niu Sila. To'afa sui o Samoa i le palemene—Taito Philip Field, Arthur Anae, Mark Gosche, Luamanuvao Laban. Tofia Mark ma minisita

28

1918 Faatonu e Logan le faamutaga o sootaga faauaealesi ma Tutuila

2009 Malo Italia i le Manu Samoa, 24-6


29

1970 Asia Samoa e le pope Pope Paulo le VI

30

1929 Avatu se talosaga a le Mau i le tupu o Siaso le 6

2002 Malo David Tua ia Russel Chasteen, T2



**E** ATOA AI le 124 tausaga talu le maliu o le misionare lausilafia sa galue i Samoa, Rev Dr George Pratt (ata) ae iloa e Samoa ia Misi Parate. E leai se Misi e iloga lona lauiloa o e sa galulue i Samoa e pei o Parate. E mafua lea ona o lona sao i le gagana a Samoa i lona atina'e. Muamua i le saunia o le uluai tusiupu ma le kalama o le gagana. Lua, i lana galuega faamaopopo i le tuufaatasiga o le Tusi Paia Samoa. O nei galuega o loo fa'aaogaina pea ma avea o ni faamanatu i lana tautua. I lana tusiupu na molimau Parate i le iai o se sootaga o lona naunau ona o mea e foliga tutusa ai le aganuu a Eperu anamua ma Samoa. E iai le faiva o lauga, le taua o le tootoo, le peritome, o aga o taua, ma le feagaiga. Na mua'i galue i Matautu Savaii ma taulamua i le fe'au o le liliuina o le Tusi Paia i le gagana Samoa. Galue foi i Niue mo sina taimi, na ia liliuina ai se vaega o le Feagaiga Fou i lea gagana. Sa ia asia le motu o Loialiti (Loyalty). A o le 'au'au o lana tautua o Samoa lea; e 40 tausaga na galue ai. O i laua ma Misi Nisipeti na toe iloiloia le Tusi Paia atoa a o lei tuuina atu mo le lomua. I faamau a Parate e molimau ai i ni laasaga o suiga o'oo'o i le gagana. Mai le gagana tautala i le tusitusi, atoa foi le liliuga mai le leo Samoa auliuli (t & n) i le k ma le g poo lea ua ta'u nei o le 'tautala leaga.' Na faaalua sona taofi ta'utino i lea maumau. Ae le na o le Tusi Paia ma le tusiupu lona sao, o iai foi ana tusitusiga e faatatau i le vao mataupu tau Samoa; o ia foi o se fatupese o le lotu. E 5 tausaga o Parate i Matautu ae maliu lona toalua, Mary Parsons Hobbs, ona toe faaipoipo lea ia Elizabeth Bicknell. Tuua le galuega ae malolo atu i Sini, ia Aperila 1879, ae maliu i le 1894, i lona 77.

## Novema i le Tala Faasolo o Niu Sila



26 Novema 1960. Amata faigamalo a Keith Holyake o le National  
27 Novema 1935. Uluai faigamalo a le Leipa i lalo o Michael Savage  
29 Novema 1877. Pasia tulafono A'oga faavae ai a'oga faalemalo  
29 Novema 1949. Tofia ulua'i faipule Maori tama'ita'i, Iriaka Ratana.

## NIUPAC PUBLICATION

Email: [evaleon.books@gmail.com](mailto:evaleon.books@gmail.com)  
Phone: (03) 382-6674  
Postal: 39 Basingstoke Street, Aranui, Christchurch 8061

All rights reserved. This bulletin and its content is protected by copyright laws of New Zealand and international conventions. Except for educational purposes, any other activity pertaining to its use is prohibited. OLA understands the rights of other copyright holders whose material we use and acknowledge always—apart from our own.

Editor:

Levi Tavita, MPS, BTheol, BA, Grad Dip Tchg  
[ltavita8@gmail.com](mailto:ltavita8@gmail.com)

Reporters:

Saili Aukuso, MA, BEd, DipTESL, DipTchg  
[saili.niupac@gmail.com](mailto:saili.niupac@gmail.com)

Vavao Fetui, MA, BEd, DipTESL, DipTchg  
[ola.niupac@gmail.com](mailto:ola.niupac@gmail.com)

## EVALEON BOOKS & NIUPAC PUBLISHING

Telefoni (03) 382-6674. Tuatusi meliE: [evaleon.books@gmail.com](mailto:evaleon.books@gmail.com)



Sponsors:

Evaleon Books & Niupac Publishing

Tautua e ala i le gaosia o alaga'oa mo a'oga (tusi mo le a'oa'oina o le faitau i le gagana Samoa, tusi e a'oa'o ai gagana, kalena, posters, yearbooks, brochures). E tautua fo'i i le fa'aliliuga o gagana, ma le tapenaina o ni tusi e fia lomua i so'o se sionara o fatuga.




**TAALOGA PASO SAMOA ~ GAGANA E LUA**

1. Faatumu le pusa i **upu/igoa Samoa** poo se tasi e faatonuina. Fill the grid with Samoan equivalents or as indicated.

**ACROSS**


- 1. to peel (5)
- 4. exam (5)
- 7. nod head (3)
- 8. donkey (5)
- 9. have a bath (5)
- 10. gnaw (3)
- 12. one at a time (4)
- 14. wash (2)
- 16. stretch body (4)
- 17. team (2)
- 18. reef (3)
- 19. although (2)
- 22. how many (3)
- 24. tie up (6)
- 25. leave home early (3)
- 27. sibling (3)
- 28. true words (7)
- 29. cave (3)



LPSTavita 2018 Copyright

- 23. school of fish (4)
- 26. customs, ways of a people (2)

**Tusi e fesoasoani:**



Solution ~ Tali



**DOWN**

- 1. farewell (8)
- 2. count (6)
- 3. Elijah (4)
- 4. to set (4)
- 5. put a pattern on a piece of cloth (4)
- 6. asset (5)
- 11. to play guitar (2)
- 13. blades (4)
- 14. grumble (3)
- 15. to save, conserve (6)
- 20. hour (5)
- 21. north (4)
- 22. Fiji (4)

*Laufatu Samoa: O se tala faasolo*

**O le peleti o Alifi**



**N**A gata la tatou tala i le evaga a le faifeau ma lana uo o Lima i le fale'aiga o Pinati; o loo faaauau le talanoaga a le uo.

E pei e faitau e Lima le mafaufau o lana uo faifeau, "Manatua foi le tatou taaloga ma Maluafou, lea toetiiti a tatou faia'ina ai. Ae mao loa ma si mea a Malala, e le galo ia a'u lena taaloga, "o Lima lea ua toe vili i tua le ata. Oso atu Alifi, "Ae faaiu i le misa i le Mauga, sosoo ai ma le tutuliga o tatou . ."

O le tutuliga lea na faamavae atu ai i le la uo o Malala. E lei toe fo'i mai Malala a o la'ua na toe taliu mai ma faamae'a le toe tausaga. Na iloa ane ua ave Malala e ona matua i Tutuila, o le isi tala na maua mai ua faigaluega i le fale i'a. Na gata mai ai iina se fesoota'iga, ma alu a'i ta'ape le faigauo ina ua alu foi Lima i Amerika.

E iloa e Alifi le taua o uo, e talitonu ia o uo o ni meaalofa a le Alii i le tagata. E auala mai ia i latou sona fa'aatoaga; tusa poo se uo fai mai e leaga, pei o Malala, ae ana leai Malala e le atoa lona atina'e i mea na ia matau ma a'oina mai i le la mafutaga. I ona vasi ma aleu e filogia ma uiga lelei. E lu'iina, tofotofoina ma faamalosia le loto e iloa atu nisi tuaoi o vaaiga. E le iloa se ao pe a leai le pogisa, se alofa pe a leai se faigata; na tau ane ai lana faitau i se mea. E faapena foi i lana uo o Lima. Na te amana'ia Lima ona o le si'omaga mautu faaSamoa na fofoa a'e ai. Sa auai i le faataulele'a a lona nuu, e talenia i taaloga ma soo se fe'au faaSamoa. E leai se mea'ai Samoa e le iloa e lana uo fai. Na te manatua le taufolo na fai a le a'oga, na autu ai ia Hand le ata, vivii ai e le pule i luma o le a'oga, ina ua tau malemo i le lololo o le pe'pe'e. O Lima na faaosofia lona naunau e su'esu'e i le aganuu.

O lea na tali mai ina ua filifili e ulufale i le a'oga faaifeau. O ia le 'tamaitai' o lana soloaiga, na toe tutu mai ai fautuaga a lana uo i lea taimi. O le faiva ta'ita'i o le fetalai, e mana'omia foi auupega a le gagana e faatino ai. "Ua aoga lau fautua mai i na aso ou te to'aga i le gagana ma le aganuu," o lana tala faamanatu lea, ae faaselavei mai Lima, "Sa ou faapea o oe o se faipule, poo se pule a'oga, o le ala lena o lo'u fai atu. Ae o si o'u lava taofi, e le o se galuega a le faifeau le aganuu, o lou lava tofi o le folafola le upu a le Alii. E lelei foi le iloa o faalupega o nuu ma nai folasaga, ae le o le fai fua e le faifeau o le tiute o le failauga Samoa," o Lima lea ma 'ata.

Ua taufai lagona e i laua ua vela le fala, ua tilotilo Alifi i lana uati ona faapea lea lana upu, "Se maimau pe ana ta o, na o ma'ua lava lo ma fale ma tamaiti. E a, se'i fai mai sau tonu?"

"E iai nai a'u fuafuaga o le vaiaso, ou te fia alu i ga 'o i le faaiuga o le vaiaso, ou fo'i mai lea ou sauni i Fiti. Ae talosia afai e faaolatia mai ou te alu atu e vaai oe ae ou te le'i alu."

Ua tuua e i laua le fale'aiga ae savavali atu i se tulimanu o laau paolo o loo tutu mai ai ni taavale. Na faasino le lima o Lima i se pikiapu pa'epa'e ma faapea lana upu, "O la'u taavale totogi. Ta o e momoli oe, o lea e le'i taitai le afiafi," ma aapa lona lima e tatala le faitoto'a i le ki. Na oso i totonu ma aapa atu e tatala le faitoto'a mo le faifeau. E te'a laitiiti le 'afa o le fa ae tuua loa e i laua le taulaga. Na tu tasi i se faleoloa e fai ai le faatau a Lima; na iloa e le faifeau o le faatau mo ia ma le aiga. E leai sana upu ae na o le faafetai le lea i le loto i lena agalelei e lei moemiti i ai. I lana tilotilo e le itiiti ifo i se \$300 le faatau. Na fesoasoani e faae'e le uta o taga ma pusa tutumu i oloa faatau. "Se, a e lailoa, fai atu foi e leai nisi na o ma'ua ma tamaiti," o upu faafitifiti, e tali ai le fa'aaloalo ua maualuga.

A o alu la la malaga ae amata ona tuufesili Lima i aga o le galuega a lana uo faifeau i lona nuu. Ua toe tulitatao iu o tala a Alifi i ana ulua'i fesili a o talanoa i le fale'aiga. "O ai la o loo sili ona faigata i le finauga lea i le fanua?" fesili Lima. "O le fesili foi lena lea ou te nofo ma a'u," tali Alifi. "Sa ou faapea o Saupo e faigata, a o lea e foliga mai o se alii e fetalai tele." "E eseese tofa," o le faauilavea lea a Lima.

Ua toe fa'auau lana tali. "Ia, o lena ma te le lei fetapa'i lava ma le toea'ina o Pu'e i sona finagalo, a o lea ua tau vavala mai ata o taulelei," o lana toe upu lea.

E te'a laitiiti le itula e 6 ae afe loa le taavale i lumafale o le faafeagaiga a Vaiola. Na iloa mai e Mose ma alo o le faifeau ma lise mai e faafeiloa'i. Ua tu le taavale ona gaiou lea o i latou e la'u le uta i le fale. Na tu mai le faletua i le faitoto'a ma autilo mai, ae valaau atu i ai Alifi, "Sau e feiloa'i ia Lima, o la'u uo." *E fa'auau*

**E lelei lau mate? Filifili le tali sa'o**

1. O le a le igoa o le a'oga lena i Samoa e iai le faasitepu numera lena? A. Vailoa E. Vaiusu I. Vaivase. Lafo mai lau tali i le pusa meli: [ola.niupac@gmail.com](mailto:ola.niupac@gmail.com), ae lafo atu sou faailoga.



**Tali Palo OLA 34:** 1. O oe o le M. 2. O oe o se pese. 3. O oe o se ata a le mafaufau—imagination.



PASI ATU LA TATOU PULETINI I LE TOU A'OGA, AIGA, LOU TUAOI, AU UO, E AOGĀ MO LE FANAU A'OGA



Igoa: Robert Louis Stevenson
Aso Fanau: 13 Novema 1850
Ausiga: O se tusitala ta'uta'ua na avea ma se tagatanuu Samoa
Fetu: Sikopiō

E iloa le ta'uta'ua o Stevenson auā e patipatia tutusa e Sikotilani na fanau ai ma Samoa na fai ma ona nuu e nofo ma lagomau tumau ai. E iloa lea i faatusa o le alii atoa ma nofoaga na soifua a'e ai; ua avea o ni mata'aga a turisi. E faapea foi Samoa, i lona maota ua toe faafo'isia i le ulua'i tulaga ma avea foi ma mata'aga a ona soo mai fafo. I taimi o Stevenson, o soo se tama ma se teine e iloa le gagana Peretania e telē le avanoa e faitau ma faalogo ai i le tusitala ma ana tala; faapei le alumia o le Treasure Island o lona o Harry Potter ma lona tusitala i nei tupulaga.

E le tasi se sionara na tusitusi ai, ma iloa ai lona ta'uta'ua. Mo le fanau, e silafia uma le Motu o Oloa na liliu e Fanaafi i le tatou gagana. E iai le Kidnapped, Catriona, ma isi. O tala uiga ese faamisiterio e iai le The Strange Case of Dr Jekyll & Mr Hyde, ua toe fagua ai le fia faitau o le to'atele, ma pu'eina ai se ata tifaga; e ta'u mai ai lona apoina pea o manatu ma tala a Stevenson e nei tupulaga.

Ua silafia le tala o le iai o Stevenson i Samoa, ma ona pelega i tagata Samoa ae faapea foi Samoa ia te ia. O se taimi vevesi i upufai o le atunuu, ae lei so'ona afaina ai lona ta'uleleia. O nisi o ana tala pupuu ta'uta'ua sa tusia i Samoa; e iai le The Beach of Falesa, The Ebb Tide. Ma nisi ana galuega faaiu na galue ai, ma lomua mulimuli ane. Na maluu i lona 44.

ATI A'E UPU:

faamalo1 (v,n). Ofo atu moomooga lelei i se isi, vivii se isi poo oe foi i se mea lelei ua faia; ofoina atu o le faafetai. Igilisi—congratulate, - ion
faamalo2 (soan). Faatatau i mataupu tau le malo poo pulega e faavae i tulafono. Igilisi—state, governmental, political
faamalo3 (v) fai ia malo (faatali se'i malo le sima); loto e faamalo le tino (tu faamalo), poo le loto (Ua faamalo lona loto).

Tulimanu o Pola:

E iai se fe'au taua i le faataoto a le Alii i le faigaluega ma le tau



E fiafia e toe faatalofa atu i le mamalu tele o le aufaitau. Malo le pale.

Toe lava o mataupu uma o loo tatou vevesi ai sa talanoaina foi i taimi o le Alii Faaola. E iai totogi o tagata faigaluega. E silafia uma le faataoto i le ana le tovine ma e na aauina atu e galulue. Uma ane ae aumai totogi e tutusa uma lava teutusi. Fai mai ua faitio le vaega na muamua gaiou; e tonu lava le faasea. Toe aumai le faatatau a le Alii e le sagatonu ma la tatou fua o le sa'o. Afai o le faatatau a le Alii o le aano ae le o le umi, e alofa la i faia'oga. E le o le alala umi i le a'oga a o le vave alu i le aiga e maua ai le fiafia.

O le isi uiga o le faataoto e ono faapea, e loto le Alii ia faalaugatasia tau i le aupalulue. Afai o le pule e galue umi, e tutusa lava lona tau ma i latou e 'afa aso. Atonu o lea e fetau ma le finau a faia'oga mo se tulaga amana'ia tutusa. Ia amana'ia pea le pule i le galue umi, ae amana'ia faatasi uma i le tutusa o totogi. E lelei ona ta'u i a Ardern le alafua. Ae ou te iloa e le lagolagoina e Stuart McCutcheon ma isi.

E malie le faitau atu i le lipoti lea i le le apoina o le ofo a le malo e tamaiti a'oga. Manatua le ofo e a'o'oga fua i le tausaga muamua iunivesite poo le politeki. E le pepelo fuainumera, sa manatu le malo e malepe i lalo le faitoto'a i le fetuleni mai o fanau e tufi ma ave. Ae leai, pe na o se 'afa o le aofa'i na fuafua, na tali mai. O le isi itu malie, o le fa'aaoga lelei o le avanoa e fanau Europa (papalagi). E 71 pasene i latou i le 29 pasene a isi, e aofia ai Samoa ma le Pasefika.

O le faameo a le aumatau, ua ave tupe i aiga e le o mana'omia tele se fesoasoani. O le itu e faanoanoa ai nisi, o le vaivai o le tali atu a o tatou tagata i lenei ofo. O le uiga o le tala, e leai se eseese o aliali mai i le taimi na totogi ai pili ma le periota lea ua tuusa'oloto ai. O lea ua valaau ai le to'atele mo le taofia o lenei faiga. Avane lona tupe e totogi lelei ai faia'oga. \$236 miliona i le tausaga o se tupe tele, e mautinoa e alu aogā i le taliga o mana'oga o faia'oga ma a'oga.

O le vaitau foi lenei o faigataulaga a ekalesia auā atina'e e ta'u ai le suafa o le Alii. E totogi ai faia'oga ma a'oga a le lotu; o taulaga i nuu ese e faatupe ai savali faamisionare ma fesoasoani i atina'e a nuu matitiva. Ana aumai lona \$236 miliona e fai ai se ipu a le malo, e mautinoa e fua faasefulu mai i tatalo a Samoa Kerisiano. E moni le autu o mafauauga o le vaiaso, e sili le manuia o le foa'i; e le pa'u fua se afu.

O le isi taulaga o le faamagalo, o lea ua faamagalo e le ta'ita'i o le malo Samoa ni 'oti fouvale mai Logan, ua sopo faamanuvale a o alaala le atunuu. Ta'u lenei o le taulaga o faamagaloga. A o nai moi'a'a na o le 'afa pe maupipi'i ai se taofi. Manuia tele.

